

«Jau sun in junkie da medias»

Intervista cun Nicolas Pernet, il nov directur dad RTR

DA DAVID TRUTTMANN/FMR

■ L'emna passada è Nicolas Pernet da Sent/Turigt vegni preschentà sco nov directur da Radiotelevision Svizra Rumantscha. El è vegni elegì or dad in carussel da 15 candidatas e candidats e daventa uschia quest atun successur da Ladina Heimgartner. La FMR ha discurrì cun Nicolas Pernet davart las midadas en il mund da medias, ma er sur da ses regal da Nadal, l'emissiu «1, 2 oder 3» e sia tschertga per in nov dachasa.

FMR: Igl è las diesch la damaun. Avais Vos gia tadlà oz radio?

Nicolas Pernet: Hai, sin mes viadi a la lavur. Jau taidl surtut SRF4 pervi da las novitads, per esser sin il current. Dapi in pèr mais taidl jau era pli regularmain emissiu sur RTR Play per udir tge che curra e passa en il Grischun. Il radio tutga atgnamain tar mes ritual da viadi. Mia dunna ha ma regalà sin Nadal in apparat da «Google home», uschia ch'jau poss atgnamain taddlar radio a moda classica, linear u on demand, simplamain sur la rait.



Nicolas Pernet, il nov directur da Radiotelevision Svizra Rumantscha.

FOTO OLIVIA AEBLI-ITEM

Cun noss dus uffants stain nus si baud

Ed avais Vos gia legì oz la gasetta?

Plitost sfeglià tras, però gea, differentas gasettas. Natiralmain il «Blick», ma era la «NZZ», il «Tages-Anzeiger» e la «Südschweiz». Quella per mantener la colliaziun cun il Grischun. La Quotidiana guard jau la saira perquai che quella vegn per posta.

Cun tantas gasettas sto voss di però entschaiver baud?

Cun noss dus uffants stain nus si plitost baud, els èn da quels da la damaun, en turn las 06.00. Ma sco ditg, jau hai surtut «sfeglià» las gasettas.

Dumandà auter: Co è Voss consum da medias?

Jau sun in junkie da medias e consumesch differentas chaussas. Surtut via internet, cun ina u l'otra excepziun. Jau sun p. ex. in fanaticher da magazins, tranter auter d'alpinissem, u alura l'«Economist» ed il «Spiegel». Televisiu consumesch jau fitg à la carte, sur SRF Play, la app dad Arte, la mediateca da ZDF u Netflix. Quai tuna da bler, ma igl è savens plitost in «zappar tras».

Igl è savens in «zappar tras»

Da nov essas Vos directur dad RTR, per relaziuns grischunas ina gronda chasa da medias, en cumparegliazium cun il «camiun» da Ringier, danunder che Vos vegnis, è quai plitost ina camiunetta. Pertge avais Vos decis per quest pass?

Igl èn stadas motivaziuns multifarias e betg in motiv central. Sco emprim: Jau hai m'occupà quests davos onns cun dumondas da digitalisaziun e svilup da medias. Ed en quel champ vulesch jau lavurar enavant, independent da la grondezza da l'interpresa. La segunda raschun: Jau hai uschia la pussaivladad da far ina contribuziun per la lingua. RTR

è er in engaschament per la lingua rumantscha, il rumantsch è la «raison d'être» da l'interpresa. Il terz motiv è plitost normativ, numnadamain l'idea dal service public. Jau sun creschì si en Engiadina durant ils onns 80 cun trais programs da televisiu e quatter da radio. Nus guardavan «1, 2 oder 3» e taddlavan François Mürner tar DRS 3. Talas emissiu eran per nus las punts or en il mund, en autras regiuns. E quai è stà pussaivel mo grazia al service public. Da pudair lavurar bainbaud tar quel ed al sviluppar vinavant, quai ma fa enorm plaschair.

Dumandà auter: Vos avais in post impurtant tar Ringier. Pertge ir davent?

Igl eran propi ils motivs positivs ch'han tentà da far il pass, damai la decisiun a favur dal nov post e betg encunter il vegl. Igl è era da dir: Ussa sun jau stà in lung temp tar Ringier ed igl era in bun mument per ina nova sfida, per novs temas, per nova glied – simplamain da far insatge auter. E per relativar l'argument da la grondezza: Tar la partiziun da la gruppa «Blick», nua ch'jau lavur uss, essan nus var 250 collavuraturas e collavuratur. Damai pon ins cumparegljar quai cun RTR, cun ses 170 emplotiads.

Quant ha era giugà ina rolla dad avair, sco directur dad RTR, in pe en la direcziun generala da la SRG SSR?

Quai n'è mai stà in motiv central. La motivaziun principala è adina stada a

favur dad RTR. Cler, i dat anc questa posiziun aifer la SRG SSR ed era la pussaivladad da contribuir als svilups medials a nivel naziunal. Ma forsa pudess ins discurre qua dad in «zutgerin» sper RTR. Er en ils gremis naziunals vegn jau ad esser la vusch per RTR, per las regiuns, per las minoritads.

Ina roschada coordinada n'è quai betg stà

Vossa antecessura Ladina Heimgartner è ida tar Ringier, Vos vegnis da Ringier. Damai guarda quai ora sco ina classica roschada che vos avais coordinada in cun l'auter?

Gea, quai pudess guardar ora uschia. Però jau hai vis che la piazza è scritt'ora cura che Ladina era gia tschernida tar Ringier. Ina roschada coordinada n'è quai dentant betg stà. Nus dus ans enconuschain da pitschen ensi, avain perfin era giugà curling ensemen. E cler, cura ch'il proceder da candidatura è i liber avain nus era bavì in u l'auter café ensemen.

Tut è capità a la fin extrem svelto

Cura che Vos entras in uffizi sco directur RTR n'è anc betg definì claramain, probabel en il decurs da l'atun. Pertge va quai uschè ditg?

Tut è capità a la fin extrem svelto. La decisiun da la SRG SSR è gea crudada pir l'emna passada. E gievgia passada hai jau alura già temp be sis uras, tranter l'elecziun e la comunicaziun uffiziala, per infurmar mes superius e collavuratur tar la Ringier. Perquai n'avain nus betg anc già temp da discutir tut en detagl. Quai ma stat dentant a cor. Però gea, jau vegn ad entrar en uffizi en il decurs da l'atun.

Las medias tradiziunals – las gasettas, ma era radio e televisiu – èn sut squitsch, cun u senza crisa da corona.

Co guarda ora tenor Vos il mund medial en trais onns?

(ri) Qua pon ins mo predir insatge sbaglià... Empruvain da dir quai tenor las differentas spartas: Las gasettas vegnan a star anc dapli sut squitsch, tut sa sposta anc pli ferm en l'internet. Ils magazins pudessan avair in futur, surtut magazins tematics. La televisiu lineara vegn a sa midar. La SRG SSR discorra da 50:50, vul dir mez linear e mez à la carte. Il radio enconusch jau il mument mo sco consumant, e tenor mai è il radio enorm stabil, ils muments per taddlar na sa midan betg grond. I dat dentant autras sfidas sco p. ex. la moda da distribuziun ed ils apparats da consumar. Las grondas midadas en il mund medial han entschet avant 10–20 onns e quel viadi cuntinuescha. Quai è ina schanza. Jau sun plitost in tip che vesa las schanzas ch'ils ristgs.

La colliaziun cun il rumantsch è ferma

Tge collia Vos insumma cun il mund rumantsch?

Personalmain bler. Jau sun creschì si a Sent, nus passentain bler temp liber en Engiadina, jau hai amis ed enconuschents rumantschs. Rumantsch n'è betg mia lingua materna, perquai che mes geniturs èn da Basilea. Però la colliaziun emozionala cun la lingua e cun la regiun è ferma. Professionalmain ma mancan sa chapescha anc raits pli intensivas cun instituziuns e personalitads dal mund rumantsch. Ma quai vegn ad esser in da mes duairs il proxim temp dad etabliar quels contacts.

Causa corona n'avais Vos betg pudì as preschentar als collavuratur dad RTR. Però en in video avais Vos preschentà e dumandà per tips nua che vos pudessas ir ad abitar cun la famiglia. Avais gia chattà ina dimora?

(ri) Gea, quai è uschia cun il video. Però tips n'hai jau anc betg survegnì fin ussa. Nus vegnin a far midada cun la famiglia, ma ans prendain temp per chattar in bun lieu. Mia dunna – che ha dal rest sustegnì mia decisiun – sto sa chapescha er anc esser d'accord!